

IE BINNEN ROUPEN (IEN AMSTERDAM)



10 jaar Grunneger kerkdinsten
in de Oude Lutherse Kerk te Amsterdam

Olle Lutherse Kerk, A'dam; (inset): köster Haro Jansen hijst de vlag

Reinder Tuitman

En zo wazzen vraauw en ik ienaint dail van n grode kulturele manefestoatsie op t Grunneger vlak boeten ons pervinzie. Ien Randstad zowaar, staarker nog ien Amsterdam, dij 'grode stad op poalen'. Doar was op 30sten oktober 2016 jaarliekse Grunneger Dainst, allerdeegs al de tiende op rieg! Je kinnen aan Komsoares van Keunenck René Paas dudelk zain dat e doar slim loos mit is. Hai stroalt gewoon, as e oet Boebel veurlezen mag. En wat haar man zien best doan op ons toal, je konnen zuver nait vernemen dat e t Grunnegers nait machtgeg was, zó schier gong t hom of. As dainst oflopen is stekt Hanne Wilzing (hai is ain van t regelplougje dij haile boudele aan loop kregen het) din ook nait onner stoulen of banken dat hai op zien beurt loos is mit dizze veurnoame 'Schriftleesder'. Nait bloots regelplougje het t noar de zin, aal t kerkvolk ien Olle Lutherse Kerk aan t Spui let zain dat ze t nait stoer had hemmen dou ze vanmörn deur wekker roupen werden om 'op te goan', of zoas Psaalm 122 ien 'Psaalms & Gezangen' t zegt: "Moak die kloar, den goan wie dommit mit mekoar noar sHeren hoes, ien sHeren stad'. Wat vraauw en mie aanbelangt,



Deo Cantemus aan t ienzingen



'wát n stuk volk'....

ons wekker ruip ons dizze zundagmörn al om vijf uur; om haalf zeuven gong bus oet Zuudloaren vot doar manlu van 'Cantemus Deo' mit noar t Groot Loug ofraaizen om Grunneger Dainst van koorzang te veurzain. Ze haren verdold dij haile grode toeringbus vol kregen en zodounde wer raais vanzulm oareg goudkoper. Wazzen aal dizze mensken nô echt zo bot roupen? Doar mag wie gerust neudege vraagtaikens bie zetten. t Zel bepoald nait zo wezen dat ze om Komsoares kwammen, Meugelk aal omreden Henk Helmantel zol der wezen, allerdeegs mit n poar van zien schilderijen en hai zol der wat over oetstukken. Zo binve ja ook: nijsgierig Mor – zeker waiten – aal dij vaaiershonderd mensken, oet ale wienstreken vot, dij vanmörn roupen wazzen, kriegen kriebels over rug as ze midden ien dat Groot Loug heur aigen Grunneger vlag wappern zain. En as ze mit k wait nait houveul lu weer ais n moal Grunnens proaten kinnen. Zeker waiten, zai vilen dat ze roupen wazzen.....

Over dat 'roupen'

Dat 'roupen' staat - mit n ofbeelden van Nicolaikerker ien n Daam (Appingedam) op veurblad van boukje doar gaang van dainst ien aangeven wordt. Henk Helmantel het kerk schilderd, alevel hai

10 Protestantse Kerkbode

Oabram zegt: 'dat e lusterde noar God wer hom as rechtveerdeghaid aanrekend...'. Wie maggen wel slim blied wezen mit Evengelie, bliede bosschop. En of t oet bliedschop of oet ontzag is, as domie Harry Donga der oet veurleest goan we aalmoal ien t èn! En dat is t din? Nee hur, domie hoalt ook nog Maarten Luther derbie aan: mörn is t ja 31 oktober en begunt Lutherjoar, ien dizze zulfde kerk nog wel. Wat het man waark moakt om gewone lu Biebel te lezen loaten kinnen; hai luit zok ien 16de aiw nait op kop zitten deur lu dij gaistelke macht haren, hai trok oet 'dat laand' vot en zette Biebel over ien gewone lu heur toal. Tegen wil en daank wer e kerkhervörmer. Zo maggen lu van Liudgerstichten zok ook reken tou 'hervörmes', zegt domie. Hai wil denkelk dudelk moaken datter nogal wat mensken touhielen en -hollen dij noar God lustern willen en n aander weg goan as dij veur t griepen ligt.

Der is nog n aander benoadern van omswienders. Lu dij wie op t heden aaldoag om ons tou zain, op stroat of op tilleviezie. Zai binnen ook op zuik. Het Laimeneer heur roupen? Of is t krekt aansom: zai binnen bie ons, omreden wiezúlm worden roupen? En dizze gemainte hier ien Amsterdam, lustert dij ook? Zoks vroag je toch nait, zol je zeggen... Mor t liekt ons tou dat ien aalsgeval Protestantse Diaconie ien Amsterdam n bult waark moakt van t Wereldhuis ien dizze stad. Kaansaarme mensken, zunder oplaaiden, oet binnen- en boetenlaand, worden der hulpen.

As t tou is aan kovvie mit Grunneger kouk noa kerkied, proat wie eefkes mit zo aine. Hai is zes moand leden oet Oeganda hier kommen, vertelt e. Hai het zulm onneronnen hou e via t Wereldhuis n beetje op stee roakt is, het allerdeegs deur toudoun van Wereldhuis n woonstee! Dat e ook al ais in Grunnen west het wil e ons ook vertellen: "Ik was eens in Leeuwarden"..... As dainst zowat oflopen is gaait vanzulm buulje rond. Ie maggen roaden waar of wie ons goaven veur geven.....

Wát n mooi woord hemmen wie oetvonnen veur mensken die noar God lustern willen: 'Haailegen' nuim wie zukt; en wie zingen 'veur ale haailegen van ale tied dij overwonnen ien heur stoere stried' (Laid 191 oet Psaalms & Gezangen). Örgelist Tymen Jan Bronda (van Lutherse kerk ien Stad) is der din ook. Hai haar net eefkes te laank vastzeten ien t Amsterdamse verkeer. Wat n geluk dat Joke Dorgelo dij t mannenensemble laaidt, ook gemainteang ien moat holdt.

(vervolg op pagina 19)



Pia Wolthuis mit Henk Helmantel aan proat

IE BINNEN ROUPEN (IEN AMSTERDAM)

(vervolg van pagina 10)

Blied wazzen wie! Nait veur niks zongen wie aan t begun van dainst; “Van bliedschop goan wie noar dit hoes doar t woord aan ons gebeurt!” Moeskestil wordt t as ‘Deo Cantemus’ ienzet mit ‘Ien stilte komt Joe lof tou, HERE’, en dij psalm ôfslut mit: ‘O God, wat bin le rij!’


Je maggen gerust zeggen dat wie vandoag roem en rij ontvangen, benoam dat ‘roupen worden’ pakt ons aan

Henk Helmantel wait ook van dat rije: as Pia Wolthuis (ook aine van t regelplougje) t mit hom het over dij stillebens van hom, zegt e: “Veur mie geldt hierbie wat dichter ien Psalm 24 al zee: ‘t Is aal van de HEER, de wereld mit aal wat doarop leeft’. Dát mag ik gern zain loaten.” t Geft ons boetendes ook n goud gevuil dat op dat luddek schilderstukje doar Biebel openligt op stee doar Olle en Nije Testemint ien nkander overgoan en Jezus zien noam levent gef, krekt dat oetdudt wat of Harry Donga ons vandoag veurholdt: roupen worden, lustern en doun noar wat of Jezus doan het

Domie Donga – wat kin man nog aaid goud Grunnegers! – wait nait wat hom overkomt as e aan t èn van dainst n kedo krigt. Joa, zegt Hanne Wilzing, (kiek ook eefkes noar zien gedicht ien rubriekje ‘Meditatief Moment’ ien dizze kerkbode) kedo was mie votlopen, mor Deo Cantemus het hom weer vongen: ‘Peerd van Ome Loeks’. Deo Cantemus zingt t; en – t sol roar wezen as t nait zo was! – haile kerk zingt mit! Donga het t verdaind vienen wie omreden hai het ale tien Gruunneger Dainsten ien Amsterdam laaid!

En... wat n schier boukje is dervan oetgeven: ‘Grunn ien Amsterdam’. René Paas krigt t eerste eksemploar, Marten van Dijken van Liudgerstichten t twijde en Eddy Visser (puutholder van dij Stichten) daarde. En noa kerktied krieg we aalmoal der ain.

As ie nô vroagen: wát was t laid dat kerkganggers t mainst oet volle borst zongen? Dat haar ie al wel docht: ‘Van Lauwerszee tot Dollard tou’! Aigenste oavend luit RTV-Noord dat luud en dudelk heuren.....



komsoares dut Schriftlezen